

Fasnacht 2017

Sali zämme scheen sin dr alli doo hitt
normal gänn mir s'Pfeetli zem Gruess nur aim sicher nit
Hand uff's Härz bi däm will sich doch kain uffdränge
wär mecht scho d'Händ vom Jogi Löw aalänge.

Im Appizäll deert hänn's dr Alpbastig all Joor
und de Bärnstyger stoht nonem Gipfel dr Wandabstig bevor
und z'Basel macht yss dr Källerabstig all Joor gluschtiger
aber dr Ziircher Abstieg finde mir vyyil luschtiger.

Im Raiehyysli Nummere 2 will dr Walti Spahn
dr Gotthard-Basis-Tunnel nochbaue an dr Modäll-Ysebahn
aber hinde im Nummere 12 hett denn d'Famile Roth
nid welle ass dä Tunnel au duur ihre Käller goht.

Mir hänn WC-Papier brucht und sinn's go boschte mitenand
aber dehai isch's mer immer verrisse in dr Hand
y ha welle wisse wie das lumpig Papier haisst das jääse
und ha tatsächlich uff dr Verpaggig PUMA glääse.

Y ha Brexit gläse und immer Brexit gheert
aber nie rächt gwisst was das bedyttet und das hett my gsteert
bis y emol Durchfall gha ha do fällt mr grad Brexit yy
das muess doch s'latinische Wort fir dr Schysser syy.

Y ha e Note gfunde und ha se denn ins Fundbüro doo
no sait dä deert dasch jo e Fälschig und hett se in sy Hosesagg gnoo
eerschtens haigs e 5 statt e 1 druff und e Null zweenig haigs au
und zwaitens sey die Note au no grien anstatt blau.

Im Rhybadhyysli im Redrose oder bim Sutterbegg
im Zauberlädeli in dr Gasse Kuchi oder im schiefe Egg
in dr Condomeria oder bim Räntner Wyss diens di glyy zwingt
dass du an däne Ort di Poscht sellsch hole oder bringe.

Friehner hänn sich d'Kätzli wild und frey proschtituiert
worum hett me ihres Revier so grien markiert
dr Grund isch will ihre Verkehr deert ökologisch sey
und dr Uss-Stoss isch zwar nit grien aber schadstofffrey.

Uff em Bundesroots-Raisli wo die Bundesreet all Joor mache
kontrolliert unterwägs dr Schneider Ammann sini siebe Sache
är hett Rägenschutz Redbull Flachmann und Proviant zem Ässe
nur dr Ruggsagg wo das alles dryy kunnt hett är dehai vergässe.

Mir hänn en App vom Putin und aini vom heggschte türkische Maa
und aini vo däm mit em Katzefäll uff em Kopf in Amerika
wenn jetz ain e Saich abloot drugg ych sy App fescht duure
denn griegt dajeenig via Internet e paar uff d'Schnuure.

Sone Hundepargg uff em Märtpatz y ka's jo verstooht
die wänn nur mit däne Daggel uss em Roothuus Gassi goo
deert hett's au e Herzogs-Pudel und e Brutschi-Wau-Wau
und e Jack Wessel und e Niederlauf-Baschi hett's au.

Es git e Studie ibere Donald Trump und syne Eskapade
deert haisst's sy Vatter sey tschuld an däm sym Schade
är haig'n als Kind drey Mool in d'Luft gworfe und allem aa
hett er'n dummerwyys nur zwai Mool uffgange gha.

Wenn ain still verschwindet ohni sy Abschied z'bekunde
denn hesch däm gsait är isch franzeesisch verschwunde
und wenn mir ohni Adie verschwinde miend nit lache
denn haisst das hitt dass mir zwai jetz dr Somaruga mache.

www.bäffzgi.ch

Wottsch au by uns bänggle?
Uff www.vsg-basel.ch erfahrsch meh!

